

KO TE UTU A TE PIHOPA.

Kotahi te mea i whakatuturutia e te Hinota o te Pihopatanga, ko te moni mo te marena kia tekau hereni hei mea mo te Tahua oranga mo nga Minita ka rokohanga e te mate turoro, mo nga pouaru mo nga pani a nga Minita. Ko te whakawhetai a te wahine, e korerotia nei i roto i te pukapuka, "me homai e te wahine nga mea e tika ana" kahore tena i whakatakotoria ki ki te ture, engari kei a ia ano te whakaaro. He pena ano te nehu tupapaku, ki te puta te whakaaro pera a te tangata nona te tupapaku, e pai ana, kei a ia ano te tikanga.

I whakaaria o Hori Korama Manuhiri, i tautokona e Rutene Te Aihu, Minita;

He ki tenei ki nga tangata o te Hahi i tenei takiwa kia kaua e wareware ki te kupu i te tau 1879, mo te Whare-karakia i Whakato kia whakaaroa, kia hangaa.

Whakaaetia ana.

I whakaaria e Anaru Te Wa, i tautokona e Karaitiana Ratapu;

Kia tukua etahi pukapuka karakia ki nga tohunga o ia pariha, o ia pariha, kia tata ai nga tangata ki te hoko i etahi pukapuka ma ratou.

Whakaaetia ana.

I whakaaria e Te Irimana Paeuta, i tautokona e Rutene Te Arahi;

Kia puta te uaua o nga Minita, o nga tangata hoki o ia kainga, o ia kainga, ki nga tamariki kia whakaakona ki nga tikanga o te whakapono.

Whakaaetia ana.

I whakaaria e Te Irimana Paeuta, i tautokona e Anaru Te Wa;

Ma te Minita me tetahi tangata ke, chara nei i te Hahiwatena e tiro tiro nga pukapuka kohikohi, e tatau hoki nga moni o nga Pariha.

Whakaaetia ana.

I whakaaria e Te Irimana Paeuta, i tautokona e Rihara Te Rangamaro, Minita;

He kupu tenei ki nga tangata katoa o ia Pariha, o ia Pariha, mo nga turoro kia whakaaturia mai ki te Minita; kia kaua e waiho kia takoto noa iho a taea noatia to ratou matenga, ka korerotia ki te Minita. He tino mea pouri tenei.

Whakaaetia ana.

I whakaaria e Karanama Moepuku, i tautokona e Hori Korama Manuhiri;

Kia puta te whakaaro a nga tangata o nga pariha e takoto kino nei te urupa, kia taiepatia te urupa kia whakapaia, kia ruritia, kia whakamotuhaketia.

Whakaaetia ana.